

Angallatini minnerni puttaquteqartoqarnissaq pillugu nalunaarut

Imarsiornerup isumannaatsuunissaa pillugu inatsimmi § 1, imm. 2, § 3, imm. 1, nr. 6 aamma § 32, imm. 10 malillugit, tak. inatsimmik nalunaarut nr. 221, 11. februar 2022-meersoq, allangortinneqartoq inatsisikkut nr. 1773, 28. december 2023-meersukkut, aamma § 1, imm. 2, § 3, imm. 1, aamma § 32, imm. 2, imarsiornerup isumannaatsuunissaa pillugu inatsisip Kalaallit Nunaannut atuutsilersinneranut peqqussut, tak. peqqussummut nalunaarut nr. 1674, 16. december 2015-imeersoq, pisinnaatitsinerit ilaasa naammagittaalliorsinnaanerlu il.il. pillugit Søfartsstyrelsenimut tunniunneqarnissaat pillugit nalunaarummi nr. 261, 23. marts 2020-meersumi § 1, imm. 1, nr. 2-mi pisinnaatitsineq malillugu, aamma pisinnaatitsinerit ilaasa naammagittalliorsinnaanerlu il.il. pillugit Søfartsstyrelsenimut tunniunneqarnissaat pillugit Kalaallit Nunaannut nalunaarut nr. 279, 23. marts 2020-meersumi § 1, imm. 1, nr. 2 malillugu:

Atuuffii aamma nassuiaatit

§ 1. Nalunaarut una angallatinut tamanut, malittarisassat allat malillugit puttaquteqarnissamut pisussaatinneqanngitsunut atuuppoq.

§ 2. Nalunaarummi uani angallat ima paasineqassaaq aqqissuussinerit suulluunniit, soorlu angallatit inuussutissarsiutit, umiatsiat, umiatsiaaqqat, prammit, immami scooterit, qaatsiartartut (windsurfing), qaatsiataarutit surf aamma paddleboards il.il., qanorluunniit siumut ingerlasaateqaralarlutik inunnit immami atorneqartartut, umiarsuit annanniutaat kiisalu nalunnermi atortussat, sissami taamaallaat atorneqartartut pinnagit.

Isumannaallisaanermut atortussanut il.il. piumasagaatit

§ 3. Angallatit tamarnik, umiarsualivimmi pitoqanngitsut, inunnt angallammiittunut tamanut angissutsimikkut eqqortumik angissusilinnik puttaqutinik imaluunniit nalunnermut puttaqutinik nassartassapput, taamaattorli tak. imm. 3 aamma 4. Puttaqutit aamma aaqanngitsut puttaqutit SOLAS-imit imaluunniit EU- suussutsimut akuerisimasuussapput, aamma Rat-meqqinik¹ imaluunniit CE-meqqinik meqqilerneqarsimassallutik.

Imm. 2. Angallatip naalagaata akisussaaffigaa, inunnt tamanut ataasiakkaanut angallammiittunut eqqortumik angissusilinnik akuerisaasimasunik puttaquteqarnissaa imaluunniit aaqanngitsunik puttaquteqarnissaa.

Imm. 3. Unamminerni, tatsini aamma immani timersornermi angallatip aquttuata tatsini immamiluunniit timersornermut kattuffiit naleqquttut isumannaallisaanermut aalajangersagaat malissallugit toqqarsinnaavai, imm. 1 malillugu siunertarineqartumi isumannaallisaanermut assinguppata.

Imm. 4. Aqqartartut, angallatini nalunaarummi uani ilaasunit assartuunneqartartut, immami qaffattaatit, aqqartartut atortussaannut ilanngullugit atorineqartartut atorsinnaavaat, puttaqutinut imaluunniit aaqanngitsunut puttaqutinut taarsiullugit.

Imm. 5. Angallatit, nakkutigineqarlutik parkini nuannaarniartarfinni sumiiffinni ikkatuni assigisaaniluunniit atorineqartartut, Søfartsstyrelsenimit akuersissuteqareernikkut, nalunaarummik uuminnga piviusunngortitsinissaminnut pisussaajunnaarsitaasinnaapput. Akuersissut politiinit imaluunniit pisortanit allanit attuumassutilinnit piumasarineqarpat takutinneqassaaq. Akuersissut Søfartsstyrelsenimit utertinneqassaaq, pissutsit taamaaliornissamut pissutissaqartitsippata.

Imm. 6. Angallatip aquttuata akisussaaffigaa, puttaqutit aamma aaqanngitsut puttaqutit atorineqarnissaanut aamma oqimaassusaasa killingi il.il. pillugit ilitersuutit malinneqassapput.

Pillaaneq

§ 4. Nalunaarummi uani § 3-mik unioqqutitsineq akiliisitsinermik imaluunniit ukioq ataaseq tikillugu parnaarussaanermik pillarneqartarpoq.

Imm. 2. Pillaaneq parnaarussivimmi ukiuni marlunni parnaarussinermut qaffanneqarsinnaavoq, imaattoqarpat

¹ Umiarsuami atortussat pillugit nalunaarut nr. 422, 17. maj 2016-imeersoq

- 1) unioqqutitsinermi inuunermik peqqissutsimilluunniit ajoqusiisoqarsimappat imaluunniit taakkunnga ulorianartorsiortitsimagaanni
- 2) siusinnerusukkut pissutsit taamaattut imaluunniit assingusut pillugit inerteqqummik tunniussisoqarsimappat imaluunniit peqqussuteqartoqarsimappat, imaluunniit
- 3) unioqqutitsinikkut imminut allanulluunniit aningaasaqarnikkut iluanaaruteqartitsisoqarsimappat imaluunniit

Imm. 3. Inuusuttut 18-it ataallugit ukiullit inuunerannik imaluunniit peqqissusaannik ajoqusiisoqarsimappat imaluunniit taamaalisoqarnissaanut ulorianartorsiortitsisoqarsimappat immikkut ittumik pissutsit sukanninnerulersitsisutut isigineqassapput, tak. imm. 2, nr. 1.

Imm. 4. Unioqqutitsilluni iluanaarutaasimasumik arsaarinnittoqanngippat, taava akiliisitsissutissap annertussusilerneqarnerani, matumani akiliisitsissummut ilassut ilanngullugu, taava aningaasaqarnikkut iluanaaruteqaataasimasup annertussusaa imaluunniit taama annertutigisumik iluanaaruteqarnissamik siunertaasimasup annertussusa immikkut ittumik isiginiarneqassaaq.

Imm. 5. Ingerlatseqatigiiffiit il.il. (ataatsimoortutut inatsiseqartitsinikkut nammineertut) pinerlunnerit pillugit akisussaaffilerneqarsinnaapput, pinerluttunik eqqartuussisarnermik inatsimmi kapitali 5-imi malittarisassat malillugit.

§ 5. Pisoq Imarsiornerup isumannaatsuunissaa pillugu inatsisip Kalaallit Nunaannut atuutilersinneqarneranut peqqussummut ilaappat, taava Kalaallit Nunaanni pinerluttulerinermut inatsit malillugu pineqaatissiisoqarsinnaavoq.

Imm. 2. § 4, imm. 2 aamma 3-mi pissutsit taaneqartut pissutsitut sukanninnerulersitsisutut isigineqassapput.

Imm. 3. Unioqqutitsinermi iluanaarutaasimasumik aarsaarinnittoqanngippat, tak. Kalaallit Nunaannut pinerluttulerinermi inatsimmi § 120, akiliisitsissutip annertussusilerneqarnerani, matumani akiliisitsissummut ilassut ilanngullugu, aningaasaqarnikkut iluanaaruteqaataasimasup annertussusaa imaluunniit taama annertutigisumik iluanaaruteqarnissamik siunertaasimasup annertussusa immikkut ittumik isiginiarneqassaaq.

Imm. 4. Ingerlatseqatigiiffiit il.il. (ataatsimoortutut inatsiseqartitsinikkut nammineertut) unioqqutitsisimappata, ataatsimoortutut inatsiseqartitsinikkut nammineertut pinerlunnerit pillugit akiliisitsissummut akisussaaffilerneqarsinnaapput. Naalagaaffimmit, Namminersorlutik Oqartussanit, kommunimit imaluunniit nunaqarfinni aqutsisunit unioqqutitsisoqarsimappat, taava pisortani oqartussaq pineqartoq akiliisitsissummut akisussaaffilerneqarsinnaavoq.

Imm. 5. Pineqartoq Kalaallit Nunaanni najugaqanngippat, imaluunniit taanna kalaallit inuiaqatigiivinut annikinnerusumik attuumassuteqarpat, aamma pineqaatissinneqarnissamut

tungavissat atorsinnaangippata, suliaq Danmarkimi suliarineqarsinnaavoq imaluunniit suliarisassangortillugu innersuunneqarsinnaalluni.

Atuutilersitsineq

§ 6. Nalunaarut ulloq 1. Juli 2024-mi atortuulersinneqarpoq.

Imm. 2. Angallatini minnerni puttaqutit pillugit nalunaarut nr. 848 af 14. oktober 1992-imeersoq atorunnaarsinneqarpoq.

Søfartsstyrelsen, ulloq xx. juni 2024

Martin Hvid John

/Malene Loftager Mundt